

DISPUTATIO MEDICA INAUGV-
RALIS
DE
MENSIBVS
DOLORIFICIS,

QVAM
SVB PRÆSIDIO
DEI TER OPTIMI MAXIMI,
AVTORITATE ET DECRETO
GRATIOSISSIMÆ
FACVLTATIS ASCLEPIADEÆ
IN
CELEBERRIMA NORICORVM VNIVERSI-
TATE ALTDORFFINA,


PRO LICENTIA,
SVMMOS IN ARTE MEDICA HO-
NORES AC PRIVILEGIA DOCTORALIA
RITE IMPETRANDI,

PVBLICO ERVDITORVM EXAMINI
AD DIEM XI. APRILIS, A.O.R. clb Is CCIX.

L. H. Q. C.
SVBMITTET

JOHANNES GEORGIVS König/
HERSBRVCCO-NORICVS.

Literis MAGNI DANIELIS MEYERI.






PRÆFATIO.



*U*mani Uteri naturam attentius considerans Aretæus, & singulæria ipsius phænomena perpendens, admiratione tandem plenus, animal quasi quoddam in animali, Uterum esse pronunciat. Quamvis autem hoc cum grano salis debeat intelligi, & non æque vita peculiaris Utero attribuenda sit, negari tamen non potest, illam partem exquisito sensu esse præditam, & peculiaribus officiis ac functionibus secundum naturam subeundis destinatam, tum etiam variis p. n. motibus molestisq; sensationibus obnoxiam: quarum sane frequentia præcis Medicinæ Scriptoribus & hodiernum pluribus e vulgo persuasit, ut existimaverint, Uterum esse ζῶον ἐν ζῶῳ, i. e. vivens in vivente. Ego, tametsi huic sententiæ in totum adstipulari nolum,

lim, cum viris tamen cordatioribus arbitror, singularem Uteri habendam esse rationem, præ multis quoque partibus aliis, in Praxi Medica, siquidem ejus affectiones & symptomata, uti peculiare quippiam sæpius ostendunt, ita etiam nihil ex iisdem adeo contemnendum est, quod non seorsim mereatur expendi. Propterea mihi, Specimen Inaugurale, juxta Decretum Gratiostii Ordinis Machaonii, jam edituro, dignum satis Thema visum fuit, si de Menstruis dolorificis, frequenti non minus, quam molesto symptomate uterino differerem: quod antequam aggredior, Divini Numinis auxilium, Lectoris autem Benevoli veniam, sicubi fuero hallucinatus, mihi expeto.



I.



DE Mensibus jamjam acturus dolorificis, incumbet mihi quidem Nominum huc pertinentium adducere explicationem, cum more receptum sit, Onomatologiam, Pragmatologix præmittere. At enim vero, cum permulti, clarissimique Viri Φιλολογώτατοι prolixam huic negotio jamdum impenderint operam, ne actum agere, aut aliorum scrinia compilare videar, haud multum sollicitus

licitus ero , de curiose eruenda Nominum origine, horumque Etymologia , Synonymia & Homonymia adducenda ; cum & parum utilitatis exinde ad Praxin Medicam , quæ merito præcipuus dicitur scopus , redundet. Paucissimis ergo saltem circa prius indicasse sufficiat *nomen*, quod *Menses*, sive *Fluxus Menstruus*, Hippocrati dicantur *ἐμμήνια*, *καταμήνια*, quorum, si cui placuerit prolixior explicatio, Lexica Medica evolventem latere non poterit. Præter hæc aliud quoque apud *Hippocratem* occurrit vocabulum, *γυναικεία* nempe; præstaret autem meo iudicio illud omittere, ad odiosam æquivocationem evitandam, cum & interdum fluorem designare legatur album, muliebrem quoque dictum. A Latinis, *Tributum* appellari consuevit *Lunare*, eo quod interdum sub hoc sidere, statum recursus tempus servare soleat.

II.

In altero nomine, quod est *dolorifici*, major latet *ἀνεπίβεια* & difficultas ; siquidem mihi non sermo est, de omni dolore, qui circa Mensium Muliebrium constitutionem p. n. concurrere solet, v. g. in nimio profluvio, aut frequentius in suppressione & retentione, cuius etiam doloris mentio aliquoties fit ab *Hippocrate*, siquidem in illis Casibus non tam doloris, etsi concurrentis, quam vel excessus quoad fluxum, vel defectus habetur ratio. Verum talis *dolor* hic potissimum a me intenditur, quem ipsi menses non immodice, aut excessive fluentes, aut è contrario penitus deficientes, sed ratione quantitatis ac temporis haud adeo exorbitantes, sive *actu præsentēs*, sive *imminentes* saltem excitant, quemadmodum hoc paulo post adhuc clarius patefcet.

III.

Ordinis nunc exposcit ratio, ut ad *definitionem Menstruorum dolorificorum* transeam, quam sequentem dare placet, quod nempe sint, *Excretio symptomatrica sanguinis ex Utero, stipata dolore plus minus gravi, circa lumbos, dorsum, hypochondria, aliasque abdominis regiones, interdum etiam ad pedes, præcordia & caput diffuso, ortum trahente, vel ab intemperie acri, vel copia, vel orgasmo sanguinis, vel etiam a vasorum angustia atque stricture; quarum tamen causarum plures in eodem individuo sæpius conspirant.*

IV.

Circa Genus est monendum, quod non sola *actio excretoria*, hic intelligatur, sed ipsum simul *excretum*, sanguis scilicet; quemadmodum omnia excretionum symptomata & vitia in pathologicis ita considerari, atque tractari solent, ut tam materiæ, quæ excernitur aut excernenda est, quam ipsius excretorii actus constitutio innotescat. Ceterum si magis ad dolorem, excretioni laudatæ supervenientem aut complicatum, respectus habeatur, ipsum hunc affectum potius ad *symptomata actionum lesarum*, & quidem seorsim p. n. auctarum referre decebit: *dolorem* enim revera esse functionem, nimirum sensationem acutam, egregie in *Propyleo Medico* pag. 90. edocuit, VIR Magnificus, Prænobilissimus atque Experientissimus DN. JACOBVS PANCRATIVS BRVNO, Phil. & Medic. Doctor undiquaque celeberrimus, in hoc Noricorum Athenæo Theoret. & Praxeos Profes. Publ. meritissimus, totius Universitatis, ut & Collegii Medici Noribergensis Senior gravissimus, Poliater Altdorfinus felicissimus, Domi-

*Domīnus Patronus , Præceptor atque Studiorum meorum Pro-
motor , summe venerandus.*

V.

De Subjecto ut nonnihil accuratius constet , di-
stingui hoc poterit in *latum & strictum* : Illud (quod et-
iam *adequatum* nuncupari solet) constituunt *personæ se-
xus sequioris* , & ordinarie quidem , quæ annos *pubertatis* at-
tigerunt , vel impleverunt , & oneri *menstruæ excretio-
nis* sunt obnoxia ad annum circiter ætatis quinquagesi-
mum. Extraordinarie autem magis aliæ præ aliis citius
vel tardius isto fluxu corripuntur , qui rursus in aliis ci-
tius in aliis tardius cessat , ut fane plurima possent alle-
gari exempla , vel præmature , vel nimis sero in decre-
pita adhuc ætate menstruatarum ; sed parco tempori.

VI.

Stricte vero sumtum istius excretionis subjectum
est *Uterus* , & specialissime *contextus ejusdem venosus* :
Quamvis enim insimul *arteria uterina* hic in censum veni-
re videantur , quatenus ut in universum ad omnes cor-
poris partes , ita quoque ad Uterum advehunt sangui-
nem , hoc loco materiam excretioni præbiturum , hanc
ipsam tamen *non fieri* ex arteriis , tum color menstruor-
um ordinarius nigricans , tum , quia citra saltum & len-
te magis profluunt , persuadet ; conf. celeberr. Dn. Doct.
Bohnii Circul. Anatom. Progymn. XVI. p. m. 254.

VII.

E quanam Uteri parte aut regione speciatim erum-
pat sanguis menstruus , non æque conveniunt inter se Au-
tores.

tores. Sunt, qui *Uteri cavitatem* aut *fundum* ejus pro fonte asserant, variis tam rationibus, quam observationibus suffulti, cujusmodi & hæc est, quam in Collegio privato Auditoribus communicavit, magnus ille Saxonum hujus ævi Æsculapius, totoque Orbe celeberrimus, D. D. GEORG WOLFFG. WEDELIVS, Hospes nuper ac Præceptor meus æternum venerandus, feminam scil. e prolapsi Uteri orificio interno manifestissime statis temporibus reddidisse menstruum vectigal. Alii vero singularis autoritatis Viri, nominatim D. D. *Bohnus*, *Bergerus*, *Ortlobius*, *Christ. Joh. Langius*, & præ ceteris mihi compellendus Vir *Magnificus*, *Prænobilissimus*, *Excellentissimus* ac *Experientissimus* DN. JOHANNES MAVRICIVS HOFFMANNVS, *Phil. & Med. Doctor undiquaque famigeratissimus*, *Sereniss. Marchionis Onoldo-Brandenburgici & Ducis Solisbaco-Palatini Consiliarius & Archiater splendidissimus*, *Anatom. Chemiæ & Botan. Prof. Publ. ut & Academ. Naturæ Curiosorum Adjunctus*, *Heliodorus dictus*, longe meritisissimus, Dominus Patronus, Præceptor & Studiorum meorum Promotor, ad cineres usque colendus, in suis egregiis Operibus Anatomico-Physiologicis, negotium illud Menstrui excretionis vaginæ uteri datum esse contendunt, allegantes in primis autopsiam, dum in dissectionibus diversarum mulierum & puellarum, paulo ante obitum menstruarum apparuit, sola uteri vagina sanguine perfusa, ipse autem Uterus plane mundus ac nitidus. Liceat mihi hujus Autorum dissensus aliquale temperamentum adstruere, nimirum fieri posse, ut in una persona e cavitate sive fundo Uteri, in altera ex ejusdem vagina sanguis menstruus proveniat. Ad quam fanè sententiam haud obscure inclinatur Excell. D. *Joh. Jac. Harder*. in *Apiario* suo Obs. 84. Schol. Et hæc quidem opinio mea, tanto minus

Causas quod attinet evacuationis menstruæ, a variis quidem assignantur variæ, in quibus tamen omnibus recensendis ego nunc non occupabor : Consulat, cui volupe est, Scriptores modo laudatos, cum quorum præcipuis statuo, nec Lunæ influxum, nec fermentum aliquod peculiare uteri, nec Archeum quendam ex arbitrio agentem, causæ principalis obtinere dignitatem. Probabilius igitur cum antea citato Magnif. D. D. BRVNO-NE in Lexico Medico p. m. 591. præter sapientissimum Creatoris institutum, ad *copiam sanguinis turgescentem*, & insimul cum acutissimo *Malpighio*, in *epist. ad Sponium*, censeo respiciendum ad *peculiarem vasorum circa uterum & vaginam conformationem*. Quantum ad illam, nempe sanguinis turgescentem copiam, eandem satis exquisite sentiunt instantibus Mensibus femellæ, prodentem se notabili vasorum intumescencia, & expansione gravativa, cum alibi, tum præsertim in abdomine & uteri regione : taceo phlogoses atque æstus, nec non præcordiorum angustationes, perquam familiares tempore mensium.

Hæc vero sanguinis turgescencia respective major
evadit in compage uteri, propter ipsius *vasorum peculia-*
rem conformationem, quatenus ea non modo insigniter
B fle-

flexuosa deprehenduntur, sed etiam seorsim hypogastricæ & spermaticæ venæ huc excurrentes, mutuis anastomosis conjungi observantur. Hinc vero rediturus sanguis ab arteriis advectus, tum intra incurvos & serpentinis venarum tubulos remoram invenit, tum ex duplici vase confluens sese ipsum in itinere aliquatenus impedire videtur, ut si non stagnationi omnimodæ, impedimento tamen insigni faveat. Hæc ipsa igitur conformatio causa est, cur ex utero præsertim excretio sanguinis peragatur, in quo etiam ejus præsentia si imprægnari feminam contingat, præ aliis partibus magis exigitur, quemadmodum hoc *ἀντισβῶς* edocuit, B. D. D. Ortolobius, Histor. Part. p. m. 149. & seq.

X.

Sed jam satis de origine fluxus mulierum menstrui me differuisse arbitror, quatenus ad rectiorem Thematidis mei pertractationem nonnulla præmittenda videbantur; neque enim postulat instituti ratio integram Catameniorum physiologiam hic proponi. Quapropter e diverticulo quasi in viam rediens, *symptoma* illud menstrui fluxus, jam supra indigitatum, *dolorem* scilicet paulo diligentius rimabor. Quod autem jam in §. 2do monui, denuo hic repeto, me nempe non acturum de omni dolore circa fluxum menstruum ullatenus accidente: nec enim quævis levior molestia, tristisque sensus, qualem interdum sanissimæ etiam feminae & puellæ, dum menstruatæ fiunt, experiri solent, ad res stricte præternaturales referri meretur. Quo vero magis elucescat, cujusnam gradus & indolis dolorem hic potissimum intelligam, sequentem casum a venerabili D. D. BR V. NONE mihi in in Collegio Practico benevole communicatum

nicatum recensebo. Femina 28. circiter annorum, non uno solum aut altero ante mensium solenne profluvium die, sed & uno postquam fluere inceperant, summos perpeffa est lumborum & ventris inferioris dolores, maxime lancinantes, pungentes, rodentes cum suffocationis periculo, usque ad animi deliquium, qui tamen deinde, fluentibus reliquo tempore mensibus, cessarunt, usque ad novum eorum periodum.

XI.

Ceterum hoc omnino constat, non ejusdem modi, sensus atque etiam gradus dolorificos Menses evenire singulis individuis, sed in diversis diversam ludere tragœdiam. Sic, (ut exempla duntaxat quædam suppeditem) aliæ femellæ, magis ante mensium eruptionem, aliæ post ipsam & durante fluxu, inprimis vero difficiliter procedente, dolorem sentiunt; hunc vero iterum differentem, tam *ratione locorum*, quam *modi afficiendi*: Nunc enim, & quidem ordinariè magis, conqueruntur de dolore in *hypogastrio* & *lumbis*, nunc altius in *hypochondriis*, ipsoque interdum *epigastrio*: non infrequenter etiam in *thorace*, & frequentius adhuc in suprema regione corporis, nimirum *capite*; apud alias denique personas in *ipsis artubus*, præsertim *inferioribus*, dolor invalescit.

XII.

Differt autem porro *dolor menstruo fluxui* accidens, in *modis afficiendi*, & hinc percepta *idea*, quam aliter atque aliter verbis exprimunt afflicte mulierculæ. Ita quædam *gravativum* saltem ac *tensivum*, quædam *ardentem*, *æstuosum* aut *inflammatorium*, quædam *pungentem* ac

rodentem, quædam denique *vellicantem* & *spasmodicum* sentire testantur. Quin sæpius in eodem individuo diversus emergit dolor, non solum regionem unam præ altera magis occupans, sed & e. g. hic tensione, illic ardore aut rosione molestus, sæpe etiam mixtus, *intermittens*, *ambulatorius*, aut aliam ludens fabulam.

XIII.

Jam facile apparet, tot tantorumque discriminum doloris circa menses obvii, non posse eandem & unicam esse *causam*, siquidem nec *proxima* ejusdem existit ubique commatis, sed in diversis subjectis diversa. Frequens admodum observatur *turgescencia* & *stagnatio sanguinis* circa uterum, quæ, licet communiter & secundum naturam contingens, exitum mox inveniente sanguine, parum negotii facessere soleat, *major* tamen & *longius durans*, non potest non dolorem efficere tensivum & gravativum, qui etiam prompte augetur, si forsan *organicum* quoddam in genere vasorum hæreat *vitium*, e. gr. *densitas* ipsorum ut & membranæ interioris uteri, propter quam sanguis ægre percurrere potest; vel *angustia* & *tortuositas venarum*, sanguini turgescenti & excretionem minus liberam invenienti, regressum versus cor impediens. Et si vel maxime inoffensum ex utero recursum nanciscatur massa sanguinea, dicto tamen modo nimium turgescens, tam in ipso transitu uterum, quam alias partes etiam remotiores, quarum vasa & meatus orgasmo & copia sua obruit, dolore gravativo mulctare potest.

XIV.

Quod si vero abundantia & orgasmus sanguinis existat

existat gravior, ut inde vasa partesque vicinæ violentius distendatur, dolor quoque exsurgit acutior, ob inchoatam continui solutionem, quam dum pro modulo suo avertere satagunt spiritus animales, in fibris motricibus undulantes, nisu contrario constrictionis, dolor magis spasmodicus resultat. Hinc est, quod mulieres laudatam sanguinis turgescientiam tempore mensium sustinentes, præter molestant distensionem, haud raro etiam spasmodico ejusmodi dolore vexentur, maxime in cruribus, quæ & propterea varicosis tumoribus passim obseffa deprehenduntur. Ceterum quo magis ad certum corporis regionem sive partem orgasmus ille sanguinis dirigitur, eo magis etiam dolorem ibi exacerbari necesse est, unde fit, ut non quælibet personæ mensibus dolorificis laborantes eodem loco vehementiorem sentiant cruciatum, sed aliis epigastrium, aliis lumbi, aliis caput &c. exquisitius affligantur.

XV.

E diverso autem principio deducendus videtur ille dolor, quem in §. XII. ardentem, æstuosum aut inflammatorium, appellavi, talis enim peculiarem M. Sneæ dyscrasiam & probabiliter quidem biliosam acremque salino-volatilem arguit. Hujus certe generis intemperies velificante inprimis plethora, non modo rarefactioni ac turgescentiæ p. n. sed etiam doloribus æstuosis & ardentibus favere plurimum potest. Hinc quoque accidit, quod ex hac causa menses dolorificos patientes varia infimul febrilia symptomata, scil. rigorem, æstus intensioris prodromum, sitim, lassitudinem & inprimis anxietates præcordiales experiantur.

XVI.

Alio rursus fundamento niti arbitror *dolorem*, qui *menstruatis* accidit, *rodentem atque pungentem*: quamvis enim tristis hujusmodi sensus ab una aut altera causarum antea dictarum derivari quodammodo possit, vero similis tamen origo ipsius ab *acrimonia scorbutica*, & *salibus* respective *fixioribus* in M. S. accumulatis, petitur. His siquidem præsentibus, quando sanguis una menstruum orgasmum concepit, facile suscitatur, impetoso & crebro acierum salinarum allisu, lancinans atque rodens dolor, sive in uteri regione, sive alibi. Quin & eadem sanguinis intemperies, aliam dolorum speciem, videlicet spasmodicam inducere valet; dum enim a spiculis salinis subinde irritantur fibræ motrices atque his contentis spiritus, certe haud difficulter spasmodica dispositio ac dolor hujus generis enascitur.

XVII.

Quemadmodum autem una interdum causa diversis dolorum ideis procreandis idonea est, ita vicissim in eodem Casu atque Subjecto allegatarum causarum plures concurrere possunt. Sic organicum in venis uteri vitium ac turgescentem sanguinis copiam non raro coincidere, jam supra in §. XIII. insinuavi. Nec rarior est intemperiei biliosæ & acris salino-volatilis, vel etiam scorbuticæ cum plethora & orgasmo sanguinis concursus ad efficiendos menses dolorificos. Imo ut verum fatear, existimaverim, rarissime ab una sola causa eosdem proficisci, sed plerumque a duabus aut pluribus simul.

XVIII.

Amplissimus sese panderet campus, si reliquos *causarum ordines* sigillatim percurrere velim: ast enim vero quæ *antecedentes* dicuntur, pleræque e jam dictis haud obscure elucescunt, quatenus e. g. *latentes in corpore intemperies biliosa, acres, scorbutica, &c.* priusquam ad actum dolorificorum Mensium pertingunt, causæ *ωενησµέναι* salutarī merentur, *Procatartica* autem longe numerosiores existunt, sed placet delibare potiores saltem. *Alimenta* fane acido-acria, fermentativa, flatulenta, orgasmum & dyscrasiam sanguinis promoventia, ut toto die dolorum symptomata inducere observantur, sic a mulieribus ac puellis, quas sive propria, sive aliena pericula hoc in passu cautas fecerunt, evitari solent. Taceo *aeris intemperiem*, quæ seu calida seu frigida sit, utroque extremo aut turgescientiam sanguinis aut stasin & coagulationem ejus inducendo, mensibus dolorificis apprimē favet. Idem tenendum est de *motu & exercitio corporis*, quando nimium orgasmo, intermissum vappescentiæ & dyscrasiæ sanguinis, hinc vero *mensibus dolorificis* diversimode occasionem largiri valet.

XIX.

Præ ceteris autem a *vehementioribus animi pathematibus*, videlicet *ira, marore, terrore*, ut alia fluxus menstrui symptomata, sic maxime dolores oriuntur. Memorabilem ejusmodi casum recenset *Joh. Nicol. Binningerus*, Cent. V. Observ. 96. feminæ nimirum nobilis, a subitaneo terræ motu perterrefactæ, statim fluxu muliebri correptæ, cui dein juxta cum symptomatibus aliis gravissimis,

vissimis, *cruciatus* etiam *atrocissimi abdominis* superveniebant. Eadem incommoda per tristitiam vehementem ac diuturnam induci, notius est, quam ut exemplis comprobari debeat.

XX.

Methodo tractandorum *thematum* conforme nunc esset, ut *signa dolorificorum mensium* evolverem, sed quoniam symptoma istud minime occultum permanet, quin potius in personarum, quibus accidit, sensum manifeste satis incurrit, Medico sufficiet, si ab ipsis ægrotis exquirat, qualis nam in specie dolor, num e. g. *tensivus*, an *rodens*, aut *æstuosus ardensve* persentiscatur? quo non solum ipsius causa latens rectius innotescat, sed & curatio congrua institui queat. Et profecto, si non a solis patientium ejusmodi relationibus, ad minimum iisdem cum pulsu aliisque fontibus signorum prudenter collatis sufficienter informari Medicus poterit. *Prognosis* vero quod attinet, *chronicis* aut saltem *periodicis affectibus* annumerari consueverunt *menstrua dolorifica*; ut non raræ existant personæ, quæ singulis mensibus, per omnem ætatem qua isti fluunt, *dolores* etiam perferre cogantur: Certe satis *rebelle*, interdum & *incurabile* malum, præsertim si *causa vitii alicujus organici*, de quo supra disserui, forte subsit; cujusmodi quippiam laudatissimus D. D. BRVNO circa casum in §. X. propositum non immerito suspicatus est. Ceterum qui ab *intemperie* aliqua originem traxit *dolor*, respective *facilius auferri* poterit: Ipso autem *pertinacius atq. atrocius affligente*, in veras *convulsiones*, *deliquia animi* aliaque fontica symptomata transitus fieri sæpiuscule solet.

XXI.

Ego ad curationem propositi affectus me nunc con-fero, indicationes præcipuas, (quæ tamen nec in quo-
vis casu simul usu veniunt) sequentes esse judicans, ut
1) dolor nimis ferociens, & pejora symptomata portendens, quan-
tum licet, obtundatur, 2) præsens forsan turgescentia sanguinis
nimia temperetur, 3) plethora imminuatur, 4) stasis & obstru-
ctio auferatur, 5) intemperies corrigatur. Quamvis autem,
quoad primam indicationem videri præcipuum possit, &
vulgo quoque soleat, contra menses dolorificos militare
narcoticis aut validioribus anodynis, & hæc inter agmen du-
centibus opiatis, utpote dolori directe oppositis, testatur
tamen experientia, quod nec eradicandæ cuicunque sym-
ptomatis illius causæ sufficiant, nec certo semper assopi-
ant malum, frequentius vero augeant, præsertim nisi
cautissime aliis convenientioribus remediis maritata ad-
hibeantur. Securius itaque, ubi dolor atrocior urget,
abdomine præsertim una flatibus distento, applicantur
clysteres paregorici, carminativi, & ejusdem facultatis
sacculi, fomenta, linimenta; interne vero cinnabarina, ca-
storinis, succinatis remixta, in aquis anethi, hirund. c. ca-
stor. carminativa, &c. offerenda, quo pacto etiam una
spasmi obex ponitur.

XXII.

Secunda autem indicationi, ut nempe turgescentia sangui-
nis forsan nimia temperetur, satisfiet per blanda refrigerantia
& sedativa, cujusmodi seorsim est nitrum, cum suis præ-
paratis, sociandum absorbentibus fixioribus & eis e g. coral-
liis, lap. & matre perlarum, Conchis præparatis, bezo-
ardico 2ali &c. propinando in aquis temperantibus, flor.
sambuc. endiviæ, lactucæ: ceras. nigror. rub. idæi, aliis-
que, præscribendo simul conveniens refrigeratorium quo-
dam-

dammodo victus regimen. Cavebit tamen prudens Medicus, ne quid nimium hic committat, & dum sanguinis orgasmum reprimere conatur, excretionem menstruam impeditiorem efficiat.

XXIII.

Quod si *plethora* adsit, & propter hanc *mensēs dolorifici* evadant, ipsamet *juxta tertiam indicationem* debet *imminui*, & quidem V. Sne, præsertim in pede, ubi commodior simul *revulsionis* locus, practicum judicio, existit. Quando autem a *particulari sanguinis stagnatione* circa uterum dolores tempore mensium excitantur, illa ad mentem *quartæ indicationis* meæ *auferenda* est: cui scopo *interferiunt res solventia & aperientia*, e.g. rad. rub. tinctor. quinq; aperient. cichor. herb. chærefol. heder. Vestr. capillor. & is, e quibus & similibus decocta & infusa parari possunt, addendo pro re nata etiam *emmenagoga*, quando nimirum languidius succedunt mensēs & suppressionem minitantur. *Martialium* vero, maxime ꝑ ij ꝑialis cachectici, Oli ꝑis, Tincturæ aperitiv. Zvvelferi, ut alias ita hic præcipue in resolvendo & aperiendo insignis usus est.

XXIV.

Quintam indicationem in eo posui, ut *intemperies corrigatur*: quam frequens enim hæc menstruorum dolorificorum sit causa, ex antecedentibus patere satis existimo. Quod si igitur *biliosa* peccet *intemperies*, huic iisdem fere remediis est occurrendum, quæ modo contra turgescentiam sanguinis commendavi; seorsim vero *purgantia*, sed mitiora, ut *rhabarbarina*, polypodium, tamarindi conducent. Ast si ab *intemperie scorbutica* dependeant mensēs dolorifici, non solum *absorbentibus alcalinis*, sed etiam

diluentibus erit litandum : quo in censu eminent *decocta*
vel infusa pugillaria calida, rad. chinæ, althææ, fœniculi,
 glycyrrhizæ, herb. fumar. veron. theæ, lign. sassafr. gua-
 jac. santal. citr. quæ non solum alterando, sed etiam eva-
 cuando per diuresin ac diaphoresin, scorbuticam intem-
 periem corrigere valent : Ad eundem collimant scopum
 essent. Lignor. fumar. ꝑ. &c.

XXV.

Insuper *diata* sollicita ratio est habenda, vitando
 errores, qui prius in una aut altera rerum nonnaturalium
 Classe perpetrati, occasionem dederunt *mensibus dolorifi-*
cis, quos præsentibus *abstinentia* aut saltem *parcior usus ali-*
mentorum, inprimis autem tam corpori quam animo stu-
 diose concessa quies, mirum allevare observantur. Sed de
 his & aliis huc fortasse referendis, propter angustiam
 temporis plura nunc addere non licet. DEO autem
 Ter Optimo Maximo, cui pro auxilio mihi præstito aliis-
 que innumeris beneficiis devotissimas ago
 gratias, sit Laus & Gloria
 sempiterna.

FINIS.



NOBIL. ET CLARISSIMO
DOMINO CANDIDATO

S. P. D.

JOH. JAC. BAJERVS, D. & P. P.

Facult. Med. h. t. Decanus.

Quod presenti Tuae Inaugurali has lineolas annexere voluerim, minime fieri existimes, quasi necessarium ducam, laborem istum & studia Tua collaudare operosius: Hec enim bonis compluribus abunde jam perspecta, sicut vinum vendibile, suspensa bедера opus non habent. Ita sane multi pro testimonio dicent, ac sponte fatebuntur, quod noverint Te ultra lastrum integrum sedulam Arti Medicae navasse operam, jactis primum fundamentis in Athenaeo Norico hoc nostro, sub fideli manu ductione inclytorum Virorum, D. D. BRUNONIS & HOFFMANNI, quorum doctrinae sapienti & meam qualemcumque, candidam tamen, circa varia Medicinae momenta jungere, forsitan non sine fructu, contendisti. Testabuntur alii, quoties in disputatoria palestra Te observaverint tam Respondentem quam Opponentem industrium, siquidem & Philosophorum subsellia, inprimis venerandi Hospitis Tui, Excellent. Dn. Professoris MOLLERI, nec non per dilecti Fratris mei Dn. JOH. GVIL. BAJERI Collegia frequentasti. Neque vero id satis Tibi visum fuit, cum ante biennium almam Jenensem, patriam meam peteres, votique compos redditus, à celeberrimorum ibi Medicorum, praesertim τὸ πρῶτον ἀνταρξίς ἄλλων D. D. WEDELII Senioris ore penderes, ipsiusque convictu gauderes. Quanta hic usus fueris solertia, ego quidem aliis predicandum relinquo, tametsi eam haud ignorem, perinde ut illud, quod, exacto Jena sesquianno, pedem promovens, meliorem Germaniam partem peragraveris, ubique locorum augendis profectibus Tuis invigilans. Ecquis autem, haec omnia considerans, non optimam spem de Te conciperet, maxime cum studia Tua Facultati nostrae in examinibus binis solennibus haud leviter jamjam probaveris? Ego itaque, ut tandem hujus epistolii scopum attingam, de re haecenus bene gesta Tibi gratulor, & ulterius faustissimos progressus, auspiciatum praesertim (quod nunc ad Belgas Anglosque paras) iter ac reditum, felix denique Praxis Medica initium atque incrementum ex animo apprecor, amorem & amicitiam meam Tibi perennantem promittens. Vale! Dab. ex Museo, V. Id. April, MDCCCIX.